

Abenduan egingo dira Serbiako hauteskundeak

BELGRAD

Aleksandr Bakocevic Serbiako Parlamentuko lehendakari neokomunistak ofizialki hauteskunde aurreratuak iragarri ditu; Jugoslavia berriko (Serbia eta Montenegro) hauteskunde federaletan batera egingo dira hauek, abenduaren 20an hain zuzen ere.

Slobodan Milosevicen 'sozialisten' (komunista ohiek) gehingoa duen Parlamentuak heregun onartu zuen Errepublikako Hauteskunde Legea. Lege honek ahalbidetu du Parlamentu eta Lehendakariaren hauteskundeak aurtengo abendura aurreratzeko.

Oposizioko buruzagiek esan dutenez, Hauteskunde Lege berria onartu ondoren hauteskundeak era demokratikoan egiteko garantiak daudenean adieraziko dute hauteskunde hauetara aurkeztuko diren.

Bitarte honetan jakiteke geratu da baita ere, Milan Panic Jugoslaviako lehen ministroak bere hautagaitzarekin aurrera egingo duen. Adituen ustez, Milosevic geldiarazteko azken saioa dira hauteskunde hauek. Asteartean errepublikan ganbarako Montenegroko ordezkariak atzera bota zuten Milosevicen Panic jokoz kanpo uzteko zuen aukera paregabea.

Majorrek bere buruzagitza jarri du bart jokoan

LONDRES

Bart zuten bozkatzekoa Erresuma Batuko diputaduek Maastrichteko Itunaren berrestea ahalbidetuko duen legea. Atzoko debatak eta bozketak baina, garrantzi berezia hartu zuen John Majorren Alderdi Kontserbadorearen zuzentzeko gaitasuna ere jarri baitzen jokoan. Gobernuburu britaniarraren aurka egingo dutela mehatxatu duten 30 euroeszeptikoak konbentzitu beharra zuen Majorrek atzoko bozketa aurretik, bestela alderdi Tory-aren buruzagitza guztiz geldituko da ahalbidea eta bere ordezkioaz hitzegen hasiko baitira.

John Smithen laboristek iragarria zuten ezezkoari euroeszeptikoena gehituz gero, zentsura mozio bati ere egin beharko dio aurre Londreseko Gobernuak. Alderdi Laboristak aurretik adierazia zuen, bart gaueko bozketan Major-galtzaile irtenez gero bere aurkako zentsura eskatuko zuela. Zentsura mozioak, noski, ez du aurrera egingo ez baita zilegi kontserbadore eszeptikoek beren alderdiaren aurka egingo dutenik pentsatzea. Hala ere, zama gehitxo hartuko du Majorrek bizkar gainean, eta guztiz ahalbidea irits daiteke Hamabiek abenduan Edinburghen egingo duten gailurrera.



UNITAko buruzagietako bat hilik datza Luandako kaleetan.

EPA

UNITAko estatu kolpea eman nahi izan zuela salatu du Dos Santosek

Angolan izan diren gatazkek kasik mila hildako eragin dituzte

Jose Eduardo dos Santos Angolako lehendakariak «estatu kolpe saioa» egin izana leporatu dio UNITAri (Angolako Independentzia Osorako Batasun Nazionala) asteburuan mila hildako eragin zituen gatazken ondoren eginiko adierazpenetan.

LUANDA

Pasa den asteburuan Angolako Polizia eta UNITAko kideen artean izandako eraso larrien ostean, herriak hartutako erabakia bertan behera utzi nahi izana leporatu zion Jonas Savimbi Angolako Independentzia Osorako Batasun Nazionalako buruari.

Dos Santosek herritarrei zuzendutako adierazpenetan baieztatu zuenez, boterea eskutik hartzea zen UNITAren helburua eta Angolako eskualdeak pixkanaka kontrolpean hartzeko

plan bat ere bazuela salatu zuen lehendakariak.

Lehendakariaren hauteskundeetako lehen itzulian garaipena lortu zuen Dos Santosek Jonas Savimbiri gailenduta. Emaizak argitaratu zirenetik ordea, UNITA ez du MPLAren (Dos Santosek zuzentzen duen Angolako Askapenerako Herri Mugimendua) garaipena onartu. Savimbik gerra zibila hasiko duela egin zuen mehatxu eta iragan asteburuan eraso latzak ere eragin zituzten Polizia eta gerrilari ohien artean.

Dos Santosek berretsi zuenez, erasoak Bie, Huambo, Huila, Bengela eta Kuanza iparraldean hasi ziren. Lehendakariak «estatu kolpea» Luandako aireportua kontrolpean hartzearen bidez lortu nahi izan zuen UNITA.

Saio horretan baina, gogor erantzun zuen Angolako Poliziak eta gatazka latzak izan ziren larunbatean. Lehendakariak «Po-

lizia eta herritarrek demokrazia eta askatasuna berrindartzeko egin zituzten ahaleginak» ekarri zituen gogora.

Komunikabideek atzo zabaldu zuten, Luandan lasaitasuna izan zen atzo nagusi. Hala ere, gatazkek eragindako kasik mila hildakoen gorpu asko kaleetan ikus zitezkeen atzo.

BAKE HITZARMENAREN PORROTA

Estatu kolpea eman nahi izan

zuela salatzeaz gain, «Biceseko bake hitzarmena bortxatzea» ere egotzi zion Dos Santosek Jonas Savimbiren alderdiari. Hamasei urtetako gerrari amaiera eman zion hitzarmen honetan UNITAren aldeko armada bertan behar uztea hitzartu zuten bi aldeek eta pasa den irailean egin ziren hauteskundeetarako dei egitea erabaki. Angolak bizi duen krisia irtenbidean jartzeko beharrezkoa iritzi zion Dos Santosek NBEk UNITA ohartaraztea.

«Errusiako inperioaren suntsiketarako» deia egin du Txetxeniako lehendakariak

GROZNI

Djokhar Dudaiev Txetxeniako lehendakariak Kaukasoko errepublikei «Errusiako inperioaren suntsiketarako» deia egin zien atzo eta bere aldetik, kanpoko erasoetatik babesteko arma nuklearrak erabiltzeko orduan ez dela atzean geratuko azaldu zuen, eta erasorik gertatuz gero «operazio militarrek Errepublikatik kanpo» hedatuko dituela mehatxu egin zuen, atzo Grozni hiriburuan emandako prentsaurrekoan.

Errusiako Errepublika auto-

nomo honetako lehendakariak Ipar Osetian osetiar eta inguxen arteko bakerako deia egin zuen, irtenbide negoziatuaren alde eta Errusiako Armadari eskualde horretatik «berehala» irteteko exigitu zion.

Indar Armatu soviatarreko jeneral ohiak adierazi zuen Boris Ieltsin Errusiako lehendakariak Ipar Osetian eta Inguxetian ezarritako salbuespen egoerak «argi» uzten duela «Errusiako agintaritzak duen izaera inperialista».

«Orain, Errusiako autonomia guztietako ordezkariak politika

errusiarraren muina ikusi behar dute, eta hitzarmen federalak duen izaera kolonialista» adierazi zuen. Beraz, «erabakirik zentzuzkoena» Errusiako autonomia guztietako diputatutak Kremlinetik aldegitia litzateke, «modu honetan, helburu nagusia lor genezake: Errusiako inperioaren desegituraketa».

Txetxeniako mugetara dagoneko Errusiako Armadako hamar dibisio heldu dira, baina Dudaieven arabera, «Txetxeniak mota guztietako armak lortzen jakingo du, nuklearrak barne, erasotzaileari aurre egiteko».

LABURREAN

LIBERIAko gerra amaitzea lor lezake EEBBen partehartzeak

Estatu Batuek Liberiara gerra untziak bidaltzeko hartu berri duten erabakiak alaketak eragin ditzake gerraren martxan, nazioarteko adituen ustez. Orain dela ia hiru urtetik gerran diren aldeak konponbide bila hastea ekar lezake EEBBen erabakiak. Afrikako Mendebaldeko Estatu Komunitate Ekonomikoaren bitartekaritzak huts egin du orain arte Liberiako gerran. Azken hiru asteotan hiru mila lagun hil dira borroketan.

PARTEHARTZE

eskasa Egiptoko hauteskundeetan

Egipton astearteko udal hauteskundeetan oso partehartze eskasa izan zen, hauteskundeon antolaketaren ardura izan duten iturriek emandako informazioaren arabera. Kairoko hautestoki askotan % 5eko partehartzea izan zen, iturriaren arabera. Alejandria eta Asiuten ere nahikoa txikia, nahiz % 8ra iritsi zen. Atzo arratsean ez ziren artean emaitzak ezagutzen.

TXEKOSLOVAKIAko Karta 77 elkarte desegin dute

Txekoslovakian aginte komunistaren garaian giza eskubideak bermarazteko eta oinarri demokratikoen alde egiteko 1977an sortu zen Karta 77 elkarte desengintzat jo zuen atzo Vaclav Havel lehendakari izandakoak. Elkarrekin «Txekoslovakian demokrazia ezartzeko egindako lan historikoa» goraiatu zuen Havel, eta egun, Karta 77 elkarteak izateko arrazoirik ez duela esan zuen.

KOLONBIAN

bederatzi polizia hil dituzte

Kolonbiako bederatzi polizia tiroz jota hil dituzte egunotan Medellinen. Poliziak berak emandako informazioaren arabera, erasoak narkotrafikarien pistoleroek egin dituzte eta gutxienez beste hamar polizia zauritu dituzte Antiokiako departamentuan.